



Zeddel
15. – 17. Hornig 2016

De Zoggelischletzer wie allewiil
Isch aber au grad gar nyt zviil

Me gseht sie fahre, ganz TRADIZIONELL
Trotzdäm scheen und ganz speziell
Lueget sie a und händ Freyd dra
uf www.zoggelischletzer.ch

Zoggelischletzer 2016
Süüschee: Mir sin TRADIZIONELL

D Süüschee-Sitzig, s isch dr Hit
Brucht dismol nid so viil Zyt
In blau-rot-wiss ganz TRADIZIONELL
E scheene Wage und eventuell
Kai Gstyrn an de scheenschte Däg vom Joor
Kaini Frooge, ischs richtig oder doch nid woahr
Mir recherchiere nid im Internet
Kemme au vor dr Fasnacht frieh ins Bett

TRADIZIONELL dien-mir d Fasnacht celebriere
Ganz ohni im Drägg go umewyehle
Vom Waggis gits Gmies fyr e feyni Suppe
Was sunscht in dr Wält lauft, isch uns schnuppe

Mir wän nyt heere und au nyt wisse
Wirsch amänd denn doch nur bschisse
Mir gniesse unseri Fasnacht TRADIZIONELL
Fahre uf dr Route und hogge tendenziell
Nid zwysche de Stiehl, sondern aifach im Stroh
TRADIZIONELL ischs immer eso.....

Mir schängge dismol, und bitte nid lache
Gmies us dr Aesche, weisch deert usem Drache
Fyr uns Waggis ischs gar kai Saich
Denn wenn äne bisch vom Daich
Duesch dini Gschängg in Blastigsägg fülle
Vo unde schreits «Waagis, Waagis» es isch zem brylle

E jede het, ganz TRADIZIONELL
Nur Gmies im Waage ufem Gstell
Als Fasnachtsgruess in eyri Wohnig
E Bliemli villicht? Mr wisses nonig

Back to the Roots, oder TRADIZIONELL
S Süüschee isch aifach sensationell
Kai Rose kai Ananas und au kai Banane
Me kennt fascht maine he nundefahne

Wenn d Bsuecher an unserem Waage steehn
Und sich wägeme Lolli d Kepf abschleen
Mir Waggis sehn das gar nid gärn
S isch Fasnacht und nid «Ziibelemärit» in Bärn

Drum fahre mir ganz «fantastizionell»
In blau-rot-wiss und TRADIZIONELL
Wird intrigiert, s verstoots nur kaine
Mir mache witer, muesch gar nid maine

Kommissione mache mir TRADIZIONELL
Bi uns in dr Schwiiz und kondizionell
Trifft das s Portemonnaie wie dr Blitz
Drum gang au ich, es isch kai Witz
In Hieber Lidl oder Aldi
Und profitier au vo spezielle Saldi

**Aber wie au immer, es freyt uns sehr
Und wie meischtens isch weniger mehr
Das Joor isch d Fasnacht ganz fyr uns
Kai Cortège-Gsturm oder settige Brunz**

**Ich zell scho d Däg bis zem 15, Hornig
Ab däm Datum isch d Wält in Ornig
Mir gniesse d Frau Fasnacht ganz speziell
Und fahre us däm Grund **TRADIZIONELL****